

Kontuola

ANTZUOLA / Egubakoitza / 2004eko uztailearen 2a / 208. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Debarroko txapelketa irabazi dute kadeteek

AINTZANE IRIZAR

Zapatu arratsaldean jokatu zituzten, Eskoriatzan, Debarroko pilota txapelketako finalak. Kadete mailan, Aitor Jauregi eta Aitor Mendizabal antzuolarrak irabazi zuten txapelketa. Hain zuzen ere, Elgoibarko bikotearen aurka jokatu zuten finaleko partidua.

Debarroko txapelketa irabazi eta Antzuolara ekarri zuten txapela Aitor Jauregi eta Aitor Mendizabal kadete mailako pilotariak. 22 eta 17, hain justu, irabazi zuten Olaldekoek, Elgoibarko Lagunak pilota elkarte Porto eta Txurrukaren aurka.

Alebin mailako pilotariak bigarren geratu dira eskola arteko Debarroko txapelketan

Urduri samar hasi zuten partidua Jauregik eta Mendizabalek, baina, pixkanaka euren jokoa hobetzean joan ziren. Lehendabiziko zatian, nahikoa parekatua izan zen partidua. 13na jarri zirenetik aurrera, baina, hautsi egin zen partidua eta antzuolarrak jarri ziren aurretik, 19 eta 13. Elgoibarreko bikoteak 17 tanto egin zituen, azkenean.

Debarroko finalera heldu aurretik, lan bikaina egin dute antzuolarrak txapelketan osoan zehar. Lehendabiziko fasea Debagoieneko bikoteek jokatu zuten euren artean; kadete mailan, antzuolarrak lehendabiziko postuan sailkatu ziren, Debagoienan. Horrela, finalerdietarako sailkatu ziren, bigarren faserako, hain zuzen ere.

Finaleko partidua Jauregik eta Mendizabalek jokatu zuten arren, hiru pilotarik jardun dute txapelketa horretan; eurekin batera, Asier Longaresek hartu du parte. Bestalde, senior mailakoak txapelketatik kanpo geratu ziren lehenengo fasean.



Asier Longares, Aitor Mendizabal eta Aitor Jauregi trofeoekin eta txapelekin.



Ezkerretik hasita, Etxaniz, Iparragirre, Madariaga, Narvaez eta Zabalo.

Gogoratu behar dugu, bestalde, Aitor Mendizabalek, eskuz banaka ere lan oso ona egin duela aurren: ETB Kantxa txapelketan, final-laurdenetara iritsi zen.

ALEBINAK ERE BIKAIN

Eskola arteko txapelketan ere lan bikaina egin dute Antzuolako pilotariak. Bigarren sailkatu dira

alebin mailako pilotariak Debarroko txapelketan; Bergara izan da txapeliduna.

Kepa Etxanizek, Iñigo Iparragirrek, Jon Madariagak, Andoni Narvaezek eta Andoni Zabalok hartu dute parte txapelketa horretan.

Aurreko astean jokatu zituzten finaleko partidua Oñatin.

LABUR

Gertu Gaek Udalaren proiektuen gainean duen iritzia azalduko du martitzenean

Azkeneko asteotan, Udalak hainbat proiektu aurkeztu ditu hainbat herritarren aurrean. Gertu Gae taldeak proiektu horien gainean eta errekaren desbideraketa proiektuaren gainean duen iritzia azalduko du martitzenean, hilak 6, 19:00etan, udaletxean.

Udaleko Hirigintza Sailerako administrari laguntzailea aukeratu dute dagoeneko

Ekainaren 16an izan zuten azkeneko froga Udaleko Hirigintza Sailerako administrari laguntzaile lanposturako aurkeztu ziren lagunek. Azkenean, Markel Azkargorta bergararrak eskuratu du lanpostu hori; berak dihardu postu horretan lanean azkeneko urteotan. Guztira, 118 puntu eskuratu ditu Markelek; Garbiñe Arrizabalaga geratu da bigarren, 84 punturekin.

Erretiratuen Eguneko bazkarirako txartelak erosteko azkeneko eguna, gaur

Datorren asteko domekan, uztaileak 11, ospatuko dute Erretiratuen Eguna. 11:30ean, meza izango dute, hildako lagunene alde. 14:00etan, bazkaria egingo dute, Herri Ikastetxeko jolastokian; ondoren, erromeria izango dute. Bazkarirako txartelak erosteko azkeneko eguna, gaur, egubakoitza, da. 18:00etatik 19:00etara erretiratuen elkarrean izango dituzue salgai txartelak.

Kalebarrengo jaietako zozketan, 482 zenbakidun txartela izan da irabazlea

Kalebarrengo jaietako zozketan, 482 zenbakidun txartela izan da irabazlea. Kalebarrengo jatetxe baten lau lagunendako afaria da zozketako saria. 15 eguneko epea dago txartela aurkezteko. Azaltzen ez bada, 1.804 zenbakidunari emango zaio saria. Antolatzaileak pozik azaldu dira jaiak izan duten arrakastarekin; herri afarian, esaterako, inoiz baino jende gehiagok hartu zuen parte.

Adolfo Arejita euskaltzain berriak Antzuolako dotrina argitaratu zuen

Adolfo Arejita bizkaitarra dugu euskaltzain berria aurreko asteetik; hil berri den Andolin Eguzkitzaren tokia hartu du berak. Arejita badu Antzuolarekin loturarik; izan ere, 1985ean, *Amilletarren Dotrina* eman zuen argitara, Mirari Alberdi bergararrarekin batera. Dotrina hori antzuolarrez idatzita dago, eta 1678. urtekoa da; badirudi Amilletako seme batek idatzitakoa dela.

Gurutz Madariaga zinegotzia dimisioa aurkeztekoa zen gaurko osoko bilkuran

Gaur, egubakoitza, egitekoak ziren uztaileko osoko bilkuran, Gurutz Madariaga EAJ-EA koalizioko zinegotzia dimisioa aurkeztekoa zen.

Iazko maiatzeko udal hauteskundeak eta gero, ekainaren 14an hartu zuten kargua zinegotzietan. EAJ-EA koalizioak ofizialki zortzi zinegotzi lortu zituen arren, bostek besterik ez zuten kargua hartu; Madariagak ez zuen kargurik hartu. Azkenean, iazko urriko osoko bilkuran hartu zuen zinegotzi kargua.




Herriko enpresak elkartu dira euskara bultzatzeko

AINZANE IRIZAR

Martitzenean, hilak 29, herriko hiru enpresa nagusietako ordezkariak (Goizper, Elay eta Matz-Errekakoek) batzarra egin zuten, euskara planak indartzeko helburuarekin. Hauxe izan da lehendabiziko batzarra eta euren asmoa da elkarlanean jarraitzea.

Hiru enpresek dituzte euren euskara planak. Orain arte, baina, bakoitzak bere kasa jardun du lanean euskarari dagokionez. Hasi berri dituzten harreman hauekin, enpresetako arduradunen helburua da bata bestearen berri izanda eta euren esperientziak elkar trukatzeko, euskara planak aberastea.

Martitzeneko batzarrean parte hartu zuten hiru enpresetako euskara batzordeetako ordezkariak; batzarraren lehen zatian, enpresa bakoitzeko ordezkariak euren euskara planen berri eman zuten: noiz jarri zuten martxan, ze ekintza egin dituzten eta egin duten lan horrekin zelako emaitzak lortu dituzten azaldu zuten, besteak beste.



Enpresa bakoitzeko ordezkariak euren euskara planen berri eman zuten.

Bigarren zatian, berriz, hainbat lantalde osatu zuten, euskara planak martxan jartzekoan izaten dituzten arazo eta kezken gainean jarduteko.

Enpresetako ordezkariak gain, Udaleko arduradunak ere egon ziren batzarrean: Iñigo

Ramirez de Okariz Kultura eta Euskara batzordeko burua eta Lierni Legorburu Udaleko euskara teknikaria, hain zuzen. Idolazko kideak ere egon ziren. Martitzenekoa lehenengo urratsa besterik ez zen izan; euren asmoa da elkarlanean jarraitzea.

JAIK

San Martzial jaiak asteburuan, Lizarragan

AINZANE IRIZAR

Eguaztenean, hilak 30, izan zen San Martzial eguna; hainbat ospakizun izan zituzten egun horretan Lizarragako auzotarrek. Oraingo astebururako ere ekitaldi ugari antolatu dituzte, urtero bezala: umeendako jolasak, afaria, erromeria, dantzarien saioa, txokolate jana...

Eguaztenean, San Martzial egunez, hasi zituzten ospakizunak Lizarraga auzokoek, eta oraingo astebururako ere ekitaldi ugari antolatu dituzte. Zapatuan, hona hemen San Martzialen egongo diren ekitaldiak: 16:30ean, herri mailako plater-tiro txapelketa jokatu dute; 17:00etan, umeendako jolasak egongo dira; 18:30ean, berriz, txokolate jana egongo da; 20:00etan, trikitilariak jardungo dute, giroa alaitzen, eta ondoren, 21:00ak inguruan, auzo afaria egongo dute. Afalostean, berriz, 23:00etan, hain zuzen ere, erromeria egongo da, trikitilariekin. Goizaldean, azkenik, 01:00etan, San Martzialgo zaku lasterketa jokatu dute.

Domekan ere ekitaldi ugari egongo da; 11:00etan hasiko dituzte ekitaldiok, txistularien diariarekin. 11:30ean, Peña Aiestuik antolatutako azkeneko txirrindulari igoera jokatu dute; 12:00etan meza nagusia egongo dute, Antzuolako abesbatzarekin. Ondoren, salda banatuko diete joaten diren guztiei, eta erretiratuendako, berriz, lancha egongo da. 13:00etan, Peña Aiestuiren bizikleta frogan sariak banatuko dituzte, eta ondoren, herriko dantzarien saioa egongo da. 17:00etan, erromeria egongo da, Jon Gardokirekin; 21:00etan amaituko dira jaiak, etxafuego jaurtiketarekin.

HERRIKO JAIETAKO EGITARAU, PREST

Udaleko arduradunek zehaztuta dute dagoeneko herriko jaietako egitaraua. Aurreko urteetako jaiekin alderatuta, hainbat berrikuntza dakartzate aurtengo jaiek.

Besteak beste, txosnek toki berria izango dute aurten: Zurra-egin jarriko dituzte. Bestalde, domekan ez da herri bazkaririk egongo; horren ordez, afaria egongo da zapatuan Zurraegin, txosna batzordeak antolatuta.

HERRITARRENHITZA/Iraia Gabilondo · Ikaslea

Maputxeak, salbuespena?

Hainbat mende luzeetan barrena, Txileko lurraldea hainbat herri ezberdinez osatua egon da. Erdialdean eta hegoaldean maputxeak bizi izan dira, bertako baliabide natural ugari baliatuz. Herri honen ahozko tradizio bidez iritsi zaigun informazioa dela eta, nabaria da bertako giza-antolakuntza nahiz antolakuntza politikoa ez-zentralizatua erabiltzen zutela.

XVI.mendean, espainiar konkistatzaileak iristean, erabateko aldaketa jasango zuten bertako biztanle ziren maputxeak. Hauek, bertako herritar-erakundeak izaki, hainbat gudetan

parte hartu behar izan zuten beraien zena defenditu ahal izateko. Hau gutxi balitz, Europatik konkistatzaileek eramandako gaixotasunak zirela medio, hamarkada gutxiren buruan lurraldeak bere benetako nortasuna galdu zuela esan genezake.

Ondoren txiletar estatuaren eraketa eman zen, ordura arte maputxeen esku zeuden lurraldeak ejerzitoak bereganatu zituen



"Historia behin eta berriz errepikatzen da eta ez du inolako mugarik"

eta europar kolonoei eman zitzaizkien. Egindako sarraski hau nolabait justifikatzeko asmotan lege batzuk egin zituzten espresuki. Lege hauen ondorio izan zen indigenen lur-erakundeak modu harrigarri batean gutxitzea, beraien lurralde izan zenaren % 6 bakarrik mantendu ahal izan zuten, beste

te lur zatietatik kanporatuak izan baitziren.

Kulturaren ikuspegitik

aztertuz, estatuaren helburu nagusia bertako indigenak txilenizatea zen, txiletar hizkuntza, erlijio eta ohiturak inposatuz; beraz, estatuaren ekintza izan zen maputxe eta beste hainbat giza talderen diskriminazio bortitza.

Argi eta garbi ikus genezake historia behin eta berriz errepikatzen dela eta ez duela inolako mugarik. Hemen maputxe izena ikus genezake, baina ziur nago izenik aipatuko ez banu irakurle bakoitzak munduko bazter ezberdinetan gertatzen den errealtatearekin lotuko lukeela, maputxeena ez baita izan salbuespena.

LABUR

KZGunea itxita egongo da irail hasiera arte

KZGunea itxita egongo da uztailaren eta abuztuaren irailaren artean, berriz, berriro zabalduko dute. Iazko otsailetik dago zabalik KZGunea Olanaren etxean. Hasieran, egunero egoten zen zabalik. Orain dela hila-bete batzuetatik hona, berriz, egubakoitz arratsaldetan bakarrik egon da zabalik, 16:00etatik 20:00etara, hain zuzen ere.

Irailetik aurrera ere aste-oro zabalduko dute, eta ikastaroak egiteko aukera egongo da.

LARREA
TABERNA
Kalebarren 17
ANTZUOLA

Tomas Gezalaga
Zoruen kutxilatua eta bernizatzea
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

GAILUR
taberna eta gozotegia
Buztinzuri 13 ANTZUOLA
Tel.: 943 78 70 32

Tomas Gezalaga
Apainketarako eta industriarako pinturak
Paper margotuak
Moketak eta tapizatuak
Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

ANTZUOLA
Apainketak eta isolamenduak
Pladurrezko dibisioak
Kalegoi 21 ANTZUOLA
676 997 400
Biltegia: 943 78 70 40